

四庫全書

史部

欽定四庫全書

景定建康志卷十九

宋 周應合 撰

山川志三

河港

古漕河一名靖安河自靖安鎮下缺口取道入儀真新河八十餘里

事跡吳聿靖安河記畧曰江出岷山道峽與荆湘沅澧至洞庭積為巨浸合沔水經潯陽東邀彭澤別為

九道會為中江東北至南徐州為北江入于海惟中江自湖口合流而下奔放蕩潏吐吞日月山或磯之則其勢悍怒觸舞大舩兀若轉梗至其廣處曠數百里斷岸相望僅指一髮而舳艫上下中流遇風則四顧茫然無所隱避自金陵抵白沙其尤者為樂官山李家漾至急流濁港口凡十有八處稱號老風波而玩險阻者至是鮮不袖手東南漕計歲失於此者什一二宣和六年發運使盧公訪其利病得古漕河于

靖安鎮之下缺口謂其取徑道於青沙之夾趨北岸穿坍月港繇港尾越北小江入儀真新河以抵新城下往來之人高秋安流八十餘里以易大江百有五十里之險實為萬世之利役之始興揚子六合上元分治其所臨之地

新河在白鷺洲西南流通大江二十餘里

事跡韓忠武王世忠碑云建炎四年金人入境車駕幸四明王聞之亟以舟師赴難烏珠聞王在京口遽

勒三十萬騎北逐王遂提兵截大江以邀之相持黃
天蕩四十八日烏珠勢危自知力憊糧竭或生他變
而王舟師中流鼓柁飄忽若神凡治津渡又皆八面
控扼生路垂絕一夕潛鑿小河自建康城外屬之江
以通漕渠幸風波少休竊載而逃 內翰汪公藻建
炎間奏議云敵于鍾山雨花臺各劄大寨抱城開兩
河以護之

蘆門河在上元縣長寧鄉去縣六十里一名蕃人河

事跡石邁古跡編云蘆門河在蘆門漾之側建炎間始開以通真州亦名蕃人河合黃天蕩南王諫議蘆場內是其處按此河以蕃名而不述其所以名意汪內翰所謂敵開兩河則此河與新河皆敵所開者否則無因以蕃名也

珍珠河在宋行宮後

事跡乃昔陳後主泛舟遊樂之河忽遇雨浮漚生宮人指浮漚曰滿河珍珠因而名焉此河通護龍河至

太平橋西分兩派一派出柵寨門一派出秦淮至嘉定間李尚書珏開後以泄霖漲見水底有大梁板乃止

小新河在東門外土橋之東

事跡嘉定八年西山真公為江東運副適遇旱蝗民阻飢欲因役以飽之為養種園前一帶河道淺狹乃撥錢米發下蔣山寺令主首繼心差本寺僧行部役募五縣人夫自土橋東開河欲至蔣山開至半山

寺後橋亭石不可掘乃止

新林港又曰新林浦在城西南二十里濶三丈深一丈
長一十二里

事跡國朝開寶八年王師收復江南曹彬等破南唐
兵於新林港即此地 李白新林浦阻風寄友人詩
有云明發新林浦空吟謝朓詩送友人遊梅湖云暫
行新林浦定醉金陵月又韓偓送客遊江東詩云君
到新林江口泊吟詩應賞謝元暉蓋元暉有新林向

板橋詩也

下蜀港在城東北一百里句容縣北六十里

事跡唐世置鹽鐵轉運使在揚州本朝都大發運使

真州皆於江南岸置倉轉般今下蜀鎮北有倉城基

並鹽倉遺址尚存後有河入大江里俗呼曰官港即

古漕河也 紹興七年二月己巳車駕未入建康嘗

次下蜀即此地也 韓子蒼嘗居下蜀

集中有與曾宏甫同行下

蜀詩下蜀追隨日歎言一散
愁籃輿隨阪路小槎波潮溝

竹篠港西至靖安東至石步南連直瀆北臨大江屬上
元縣金陵長寧兩鄉由靖安港口至城二十里由石步
港口至城四十里在唐世已曰竹篠港邇時於靖安港
口得偽吳所鑄錠石云吳順義元年都城鑄

石步港在上元縣長寧鄉去縣四十里

事跡石邁古跡編云攝山西花林市之東有曰石步
港西連竹篠河北出大江 徐鉉臨石步港賦詩有
云吹浪游鱗小黏苔碎石圓

溝瀆

潮溝吳大帝所開以引江潮接青溪抵秦淮西通運瀆
北連後湖其舊跡在天寶寺後

天寶寺故基在今城東北角外更西一里長壽

寺前

事跡實錄云潮溝東發青溪西行經古承明廣莫大
夏等三門外西極都城牆對今歸善寺西南角南出
歸善寺故基在今城北雞籠山東經閭闔西明二門
接運瀆在西州之東今筴橋西南流入秦淮乾道南

北橋河是也其北又開一瀆經栖元寺門

栖元寺在覆舟山西

南雞籠山東北

至後湖以引湖水至今俗亦呼為運瀆其實

古城西南行者是運瀆自歸善寺門前東出至青溪

者名曰潮溝其溝東頭已堙塞繞有處所西頭則見

通運瀆 京都記京師鼎族在潮溝北 石邁古跡

編曰按建康實錄所載皆唐事距今數百年其溝日

以堙塞未詳所在今城東門外西抵城濠東出曲折

當報寧寺之前亦名潮溝此今世所開非古潮溝也

案徐鉉有和鍾大監泛舟詩云潮溝橫去北山阿
張忠定公亦有詩云潮溝一曲已生蒲則是南唐及
宋初潮溝古跡猶在也 東南利便書曰古城向北
秦淮既遠其漕運必資舟楫而濠塹必須水灌注故
孫權時引秦淮名運瀆以入倉城開潮溝以引江水
又開瀆以引後湖又鑿東渠名青溪皆入城中由城
北塹而入後湖此其大畧也自楊漕夾淮立城其城
之東塹皆通淮水其西南邊江以為險然春夏積雨

淮水泛溢城中皆被其害及盛冬水涸河流往往乾

淺

朱存詩云流水東西傍帝臺六朝重為兩朝開曾看鷁首知高下莫問漁舟識去來

野亭馬之純

詩云潮溝溝外盡深泥上潮生溝却低直向北行連運瀆折從東去入青溪空中不斷檣烏過岸上相望瓦翼齊好是畫橋深曲處荷花盈蕩柳垂堤

御溝在古御道兩旁歲久堙塞

事跡南史桂陽王休範舉兵杜黑驪乘勝渡淮黃門

侍郎王蘊傷重踣於御溝之側 實錄朱雀門北對

宣陽門相去六里名為御道夾開御溝歲久堙塞今

宮城以南御街兩邊俱有溝在居民屋下者乃南唐

所開非六朝之舊跡

吳融詩云一水終南下何年派作溝穿城初北注過苑却東流

遶岸清波溢連宮瑞氣浮去應涵鳳沼來必滲龍湫

激石珠爭碎

紫堤練不收照花長樂曙泛葉建章秋

影炫金莖表光搖綺陌頭旁沾畫眉府斜入教簫樓

有雨難澄鏡

無萍易擲鉤鼓宜堯女瑟盪必蔡姬舟

臯看通鳴鶴津應接斗牛迴風還漱漱和月更悠悠

淺憶鴈堪泛

深思杖可投祇懷涇合慮不帶隴分愁

自有朝宗樂曾無遺穴憂不勞誇大漢清渭貫神州

王半山詩云

渺渺金河漲欲平數支分淥報清明

常縈輦路漂花去更飲流杯送酒行靜見金輿穿樹

影清含玉漏

過牆聲哀顏一照自多感回首江南春

生水

霹靂溝在城東五里王半山有詩云霹靂溝西路柴荆
四一家

百丈溝一名百步溝在溧陽縣南三里源出燕山相傳
云此處田多高仰開溝以灌溉東流合於白雲逕下入
太湖

鐵冶溝在鍾山鄉馬鞍山之下有地三畝餘皆鐵近水
垠通小港耆老皆呼為鐵冶溝

事跡梁時作三埧堙淮水以灌壽州一於壽州一於

荆山一於盱眙久不能成聚江南之鐵融液載往堆
築之上種榆柳一夕崩壞聲聞數里棄所聚之餘鐵
於此至淳祐七年趙都督葵於其旁置爐鞴十數以
鑄鐵砲匠人烹鑿其地堅不可入乃已

直瀆在城北隸上元縣鍾山鄉去城三十五里濶五丈
深二丈西至壩埂東北接竹篠港流入大江旁有直瀆
山直瀆洞吳後主所開瀆道直故名曰直瀆

舊志

事跡輿地志云白下城西南有蟹浦蟹浦西北有直

瀆 伏滔北征記吳將甘寧墓在此或言墓有王氣
孫皓惡之乃鑿其後為直瀆 晉蘇峻舉兵溫嶠帥

師救京師遣王愆期等為前鋒次直瀆即此地 楊

修詩注云瀆在幕府山東北長十四里濶五丈深二

丈初開之時晝穿夜復自塞經年不就傷足役夫卧

其側其夜見鬼物來頃因嗟曰何不以布囊盛土棄

之江中使吾徒免殫力於此傷者異之曉白有司如

其言瀆乃成

朱存詩云晝役人功夜鬼功陽開陰闔
幾時終不聞擲土江中語爭得盈流一

水通野亭馬之純詩云直瀆如何計得工長江雖
遠欲相通比嘗開鑿不勝苦已復淤填還似空聞鬼
夜中皆有語棄泥江裏解成功有
司號令纔依此滾滾波流漸向東

運瀆在上元縣西北一里半吳大帝赤烏三年使左臺
侍御史郗儉監鑿城西南自秦淮北抵倉城通運於苑
倉今所鑿在城西門近南其水東行過小新橋而南經
斗門橋流入秦淮又東北過西虹橋循宋行宮城西迤
邐向北乃其故道其自閃駕橋經天津橋而東者合於

青溪
舊志

事跡案建康宮城即吳苑城城內之倉曰苑倉故開
此瀆通運倉所時人亦呼為倉城晉咸和中修苑城
為宮惟倉不毀是名太倉在西華門內道北

朱存詩
舳艫街

尾日無虛更鑿都城引漕渠何事
餒來貪雀穀不知留得幾年儲

破岡瀆在句容縣東南二十五里

事跡實錄云吳赤烏八年使校尉陳勲作屯田發屯
兵三萬鑿句容中道至雲陽西城以通吳會船艦號
破岡瀆上下十四埭上七埭入延陵界下七埭入江

寧界晉宋齊因之梁改為破墩瀆遂廢而開上容瀆
陳高祖即位又堙上容瀆而修破岡至隋平陳乃廢
後宋少帝於華林園開瀆聚土以象破岡埭與左右
引船唱呼以為歡樂

義溝瀆在城東二十里源出東青村下入秦淮長七里
溉田一百餘頃

徑瀆在溧陽縣北三十里水自金壇縣界來入長塘湖
鎮江志謂晉宋舊有此瀆隋大業初縣令達奚明又加

疏決

池塘

放生池案舊圖經唐乾元中詔於江寧秦淮太平橋臨江帶郭上下五里置放生池八十一所有碑昇州刺史顏真卿文舊以府治東東接青溪北通運瀆者為之

舊志

今秦園之側府學之東即古放生池也淳熙間史待制正志移放生池于青溪建閣其上遇祝聖立班閣下府學遂因舊放生池為潁水其流亦通青溪王尚書埜以

其池乃祀聖之地立板榜于舞雩亭門禁漁捕池近行路水深而堤不固時有溺死者馬公光祖聞而憫之池名放生豈容有溺死者乃命能仁寺僧築堤甃街立大木為欄檻自是無溺者矣又修闢青溪閣前為飛梁繚以朱欄深迥汪洋塵迹莫能到也天基節放生其間真足以浚皇仁而遂物性詳見青溪閣下

天泉池宋元嘉二十三年鑿一名天淵池

舊志

事跡龔穎運厯圖云晉孝武太元十年大旱井瀆皆

竭太官供饗皆資天泉池自晉已有此池矣 沈約
宋書云明帝泰始二年天泉池白魚躍入御舟 梁
書陸榮公傳云天泉池中新製舟形狹而短惟引太
常劉之遴國子祭酒到溉右衛朱异中書黃門郎陸
倕同載 江總華林園天淵池銘云曉川漾璧似日
馭之在河宿夜景流金疑月輪之馳水府今宮城後
法寶寺西南菜園中荒池尚餘一畝即此池也

善泉池一名九曲池在臺城東東宮城內周迴四百餘

步

事跡金陵故事梁昭明太子所鑿中有亭榭洲島曲

盡幽深之趣太子泛舟池中嘗曰何必絲與竹山水

可忘情

野亭詩十頃青瑤浸碧流更添景趣極深幽
旁為九洲十八島上有五城十二樓苔雪荷

花風度曉瀟湘蘆竹雨生秋
昭明心想知何似好聽
騎鯨汗漫遊楊虞部詩影浸龍樓徹鳳城昭明有

意在澄清穿時深欲狀渙渤樂府當歌重潤聲
鮑謹由夷白堂小集云甲午春與李之儀端叔葉棫新

之高秀實茂華同過景陽臺九曲池辱井三品
石慨然成詩有云平池九曲在春水縈彎碣

飲馬池宋大明中立于玄武湖北上林苑中

洗鉢池在蔣山寶公塔西二里法雲寺基方池是也

覆盃池今城北三里西池是也

事跡晉元帝中興頗以酒廢政丞相王導奏諫帝因

覆盃于池中以為誠

馬野亭詩當初一馬過江來幕府山頭刈草萊無數流離未安

集幾多政事合圖回只應早起觀庭燎安得時常近

酒盃江左中興仗誰力一池春水泛新醅

楊虞部

詩金盃覆處舊池枯此後還曾一醉無

東晉中興股肱力元皇亦學管夷吾

西池案宮苑記在太初宮西門外吳之西苑今惠日寺

後池也

舊志互見太子湖

事跡吳宣明太子孫登所創謂之西苑 世說晉明

帝為太子時欲作池臺元帝不許太子養武士一夕

中作比曉便成即今謂之太子西池 丹陽記曰西

池孫登所創吳史所謂西池明帝重修之耳 記室

新書云西苑內有太子池孫權子和所築 實錄注

云其宮城西南角本有池名清遊池通城中樂賢堂

並肅宗為太子時所作 晉中興書云溫嶠拜中庶

子在東宮甚見寵嘉僚屬莫與為京數規諫諷議甚

有補助太子時起西池樓觀頗多勞費嶠口疏諫太
子納焉 建康實錄云晉太元十年苻堅為姚萇慕
容冲所攻遣使求援詔謝安率衆救之帝自行西池
宴羣臣餞安賦詩者五十八人其地當在今宮城之
西北 晉書云劉毅征盧循敗歸帝大宴于西池有
詔賦詩毅詩云六國多雄士正始出風流毅自以武
功不競故示文雅有餘也 劉叔源詩悟彼蟋蟀唱信
此勞者歌有來豈不疾良
遊常蹉跎逍遙越城肆願言屢經過回阡被陵闕高
臺眺飛霞惠風蕩繁囿白雲屯層阿景晷鳴禽集水

木湛清華褰裳順蘭沚徙倚引芳柯美人愆
歲月遲暮獨如何無為牽所思南榮誠其多

濛汜池在臺城內

舊志

事跡梁陳龍舟嬉遊之所楊虞部嘗賦詩

春條拂岸
柳如金一

鑑澄空照底深傍見龍舟
赭袍影分明紅日在池心

柵塘在秦淮上通古運瀆不詳其始

舊志

事跡實錄注吳時夾淮立柵號柵塘

王隱晉書云

王敦反以兄子應為嗣沈充自吳率衆萬餘人至與
王含合充司馬顧颺說充曰今日舉大事而天子已

扼其喉情離衆沮持疑猶豫必致禍敗今若決破柵
塘因湖水灌京邑肆舟艦之勢極水軍之用此所謂
不戰而屈人兵上策也充不用其言 王敦教誅郭

璞璞謂伍伯曰吾年十三時于柵塘脫袍與汝吾命
應在汝手中伍伯感昔念惠銜涕行法 梁天監九

年新作緣淮塘北岸起石頭迄東冶南岸起後渚籬
門達于三橋作兩重柵皆施行馬至南唐時置柵如

舊馬野亭詩六朝何處立都城十里秦淮城外行上
設浮航如道路外施行馬似屯營關防直可防津

渡緩急徒能禦寇兵非是後其後置閘洩城內水入
來謀改築如何今日作陪京

于江俗呼為柵寨門乾道五年史公正志重修後廢
景定元年馬公光祖重建詳見城闕志

橫塘案實錄注在淮水南近陶家渚緣江築長堤謂之
橫塘淮在北接柵塘舊志

事跡宮苑記吳大帝時自江口沿淮築堤謂之橫塘
北接柵塘在今秦淮逕口吳時夾淮立柵自石頭南
上十里至查浦查浦上十里至新亭新亭南上十里

至孫林孫林南上十里至板橋板橋上三十里至烈

洲 吳都賦曰橫塘查下邑屋隆夸樓臺之盛天下

莫比

楊虞部詩早潮繞過晚潮來一一軒窓照水開
鑑面無塵風不動分明倒影見樓臺 馬野亭

詩如今何處是橫塘在府城南淮兩旁魏蜀兩都皆
不似蓬萊三島足相方烏衣巷口排金屋朱雀橋邊
立粉牆有底繁華難說
似何妨把作畫圖張

倪塘在城東南二十五里

事跡晉書王敦自湖陰使王含錢鳳等以兵五萬逼
京師帝親率大軍次南塘夜募勇士陳嵩等領甲卒

千人渡水掩其未備大破含軍于越城含軍既敗乃率餘黨自倪塘西置五城如却月勢即此處也南史劉毅初當之荊州表求東道還建鄴辭墓去都數十里不過拜闕宋武帝出倪塘會毅胡藩請殺之帝曰吾與毅俱有尅復功其過未彰不可自相圖其後北討謂藩曰若從卿倪塘之謀無今舉也梁書陳霸先既破侯景時齊兵自秣陵東跨淮立橋引兵渡自方山進及倪塘互見五城

臨賀塘在城東三十里屈曲一十里灌田二十頃梁臨賀王蕭正德理田于此因以為名

銅塘在城東四十里屈曲一十五里溉田二十頃

長塘在城東南六十里屈曲五十里溉田一百頃

王塘在城東四十里屈曲一十五里溉田三十頃

開善塘在城東三十里屈曲一十五里溉田二十頃

蠡湖塘在城北二十里屈曲一十三里溉田一十頃

劉塘在城北三十里屈曲二十里溉田一十頃

水門塘在城東三十五里屈曲二十里溉田一十七頃
郭于塘在長隱山東其塘五畝深五尺一寸灌田六十
餘畝其近村亦以郭于名水常滿鄉人涸之必有震電
屬茅山鄉十三都石頭堰

上鈴塘在句容縣南一十三里計四十一畝一角四十
二步深五尺三寸灌田一百一十三畝

下鈴塘計六十六畝二角三步深五尺三寸灌田二百
單二畝

郭西塘在句容縣西一里計一百八十畝一角五十步
深七尺三寸灌田五百七畝

南黃塘在句容縣東北十里赤堽約八畝深五尺灌田
二百頃

西黃塘在句容縣東北十里澗西大小十三所廣一十
五畝灌田一百五十頃

井泉

景陽井一名胭脂井又名辱井在臺城內陳末後主與

張麗華孔貴嬪投其中以避隋兵其井有石欄多題字
舊傳云欄有石脉以帛拭之作胭脂痕或云石脉色類
胭脂案曾南豐集辱井銘曰辱井有篆文云辱井在斯
可不戒乎井下文共十八字在井石檻上不知誰為文
又有景陽樓辱井銘又有陳後主叔寶辱井記云江寧
縣興嚴寺并石檻銘莫知誰作也今皆磨滅唯辱井銘
數字彷彿可辨

舊志

事跡案南史隋克臺城陳後主與張麗華孔貴嬪俱

入井隋軍出之 韻語陽秋曰金陵之法寶寺井有
石欄紅痕若胭脂相傳云後主與張孔淑所染 皇

朝蘇易簡嘗作陳宮井記今石刻在行宮學士院內
記云陳宮井閣遺址僅存傍有石甃石欄周以垂篆
年禩寔遠辭旨殘缺其可觀者有戒哉戒哉數字詢
諸耆艾即陳之季主避兵之井也詰其篆刻即後之
名士垂訓之文也敢復明其志而言曰嗚呼惟天匪
親君為司牧司牧之畏有若厲也有無為也苟非厥
道雖降志辱身未足補過苟底厥績則憑几高視可
以致理是故為人君者可不戒哉叔寶之盜南國也
恃民心慢天鑒忘吞日之業休投籤之範淫酒之失
一至於此且城下之盟床下之巽前聖尚或恥之矧
於沈井哉夫唐虞之懼與陳主之懼一也文武之樂

與陳主之樂一也唐堯統天文思安安御彼黃屋如
臨深淵此避兵之井也虞舜君臨德音愔愔睦彼二
女樂而不淫此又同繩之妃也靈臺靈囿其文王之
結綺乎公旦公奭其武王之狎客乎四聖克念勃然
而昌後主反是溘然而亡為樂之理孰否孰臧余因
公暇遊斯地觀斯井弔往憤懣故窮理盡性磐其石
而文之南豐曾公鞏辱井銘辱井有篆文云辱井
在斯可不戒乎并下文共十八字在井石檻上不知
誰為文又有景陽樓下井銘又有陳後主辱井記云
江寧縣興嚴寺并石檻銘莫知誰作也歷序隋文帝
命晉王廣伐陳後主自投井中令人取之驚其太重
及出乃與張貴妃孔貴嬪三人同束而上其末云唐
開元二十二年三月十七日前單父縣令左轉此縣
丞太原王以下闕王荆公詩結綺臨春草一坵尚
殘宮井戒千秋奢淫自是前王恥不到龍沈亦可羞
楊虞部詩擒虎戈矛滿後宮春花無樹不秋風蒼

惶益見多情處同穴甘心赴井中
闕名詩結綺春休玉樹殘陳王猶自惜姝顏石床空染胭脂恨不比
雙妃楚竹斑
曾極詩寒泉玉甃沒春蕪石染胭脂潤不枯杏怨桃羞嬌欲墮猶將紅淚灑黃奴馬野
亭詩應說兵來且莫降急尋宮井共深藏側身待作
凌波步仰首還成半面粧已分葬埋依古甃可憐牽
挽出銀床至今汲水人皆說猶帶胭脂舊日香
闕名詩羅綺香中狎客吟望仙樓閣半天心誰云龍虎
灘頭水不及庭前
習井深闕名詩複道連廷亘碧空庭花無日不春風天翻地覆江山在贏得聲名習
井中

龍天王井在臺城前舊傳梁武帝為郗后立龍祠井上
號龍天王井梁陳皆祀之
舊志

事跡六朝記云梁武帝郅后性妬忌武帝初立未冊
命因忿懟乃投殿庭井中衆赴井救之已化毒龍煙
焰衝天人莫敢近帝悲歎久之乃冊為龍天王使井
上立祠自梁歷陳享祀不絕陳滅乃遷其祠於京城
道德寺大業初又置祠於舊處

義井在城南天禧寺側天聖五年丞相李公迪所鑿
事跡義井記畧曰相國隴西公赴鎮江寧思福黎庶
志在康濟常慮一物不得其所有塔主大律師可政

者乃謂城之南隅康衢四達憧憧往來朝及其夕請
官之隙地特建義井俾歷炎酷以濟其衆公躍聞斯
美筆允其請遂募其積善者唐文遇出家帑以備其
事畚鍤星聚穿鑿聿成固砌翠珉廣覆華宇冽冽其
泉縱鑠金焦石其源靡息輪蹄絕慮魚樵無患老幼
承惠矣天聖紀號五載孟春月一十有六日記銀青
光祿大夫行尚書刑部侍郎碑字內堤堰橋道提舉
江南東路兵甲巡檢公事上柱國李迪

三義井在石頭城後清涼寺莊及石子岡七里舖共三井

事跡南唐保大三年置井欄上有僧廣慧刻字以記歲月又案金陵故事有三井在瓦棺寺後汲一井則二井俱沸因名其地為三井岡

應潮井在蔣山頭陀寺山頂第一峰佛殿後

舊志

事跡蔣山塔記云梁大同元年後閤舍人石興造山峯佛殿殿後有一井其泉與江潮盈縮增減相應

段成式酉陽雜俎云蔣山有應潮井在半山之間俗傳云與江潮相應嘗有破船朽板自井中出貞觀中有牧兒汲水得杉板長尺餘上有朱漆字曰吳赤烏二年豫章王子駿之船石邁古跡編曰應潮井蔣山之頂古頭陀寺之後其井與江潮相通盈縮往來常應之時于井間得蘆根斷帆之屬

楊虞部詩碧甃時時減復增山

頭海面密相應古來泉脉誰穿鑿潮落潮生不暫澄馬野亭詩俯看滄海仰看山相去分明霄壤間有井無冬亦無夏與潮俱往又俱還想應透徹深無底怪得浮沈轉似環不用浙江亭上望請君來此一憑

藏水井案宮苑記在城東北十里覆舟山北

舊志

事跡宋孝武大明中鑿以藏冰齊梁陳皆因之

楊虞部詩

尤喜凌人職未隳閑藏出納示歲規戰兢國步艱難者常似臨深履薄時

馬野亭詩向日周家有凌人

後來此事特相因冬時室內收藏早夏日宮中給賜新但得滿盤堆水玉不須對面著風輪看來深濶能多少調得陰陽冷處均

沸井在句容縣東三十五里

事跡丹陽記曰句容縣有沸井亦曰沸潭又曰句容

縣東三十五里有龍岡岡頂有沸潭周迴十二丈聞人聲便沸不聞不涌也 異苑曰句容縣有延陵季子廟廟前井及瀆常自涌沸于今猶然圖經云在縣東三十里虎耳山

響井在江寧縣陶吳鎮西北二百餘步

事跡響井欄上存元祐五年四字或以紗帛蒙其上以物擊之則作鼓聲或以瓦石投其中則作鐘磬聲今屬陳主簿家園中

許長史井在茅山玉晨觀內今有碑碣存

舊志

事跡陶隱居云舊在許長史宅歲久堙沒後得井于

觀中其泉色白而甘

有井銘乃徐鉉所作

長史含道棲神

九天人非邑改丹井存焉射茲谷鮒冽彼寒泉分甘玉液流潤芝田我來自西尋真紫陽若愛召樹如升

魯堂敬刊翠琰永識銀床噫嗟後學挹此餘光

陶隱居井在茅山華陽宮前橋東

舊志

事跡陶貞白七次丹成皆中等神人告以定分止合得此中丹于是服之遁景而去井歲久堙沒政和

初道士莊慎修索而得之初去三尺許得瓦井欄雖

破合之尚全環刻大字

先生丹陽陶仕齊奉朝請壬申歲來山棲身高靜自號隱

居同來弟子吳郡陸敬游其次楊王吳戴陳許諸生供奉階字湖熟潘還及遠近宗稟不可具記悠悠歷代詎勿識焉梁天監三年八月十五日錢塘陳宣懋書

及見磚甃又穿數丈獲

一圓石硯徑九寸許列十一趾滌之朱色粲然又得

銅鑪有柄若今所謂手爐者仍于砂石間有丹一粒

大如芡實光彩射人亟取之遂墮井中水極甘冷雖

大旱不竭爐硯藏宮中

樂官井在溧陽舊縣寨東百餘步

事跡南唐時東以太湖與錢氏分界溧陽屯兵間遣諸子巡視有憇于驛者樂工忤意沈之井滯魄為崇託宿必魘或死無敢入者後有達官欲寓宿驛吏以事告不信其夜果見服緋綠者數輩自井出叱問具陳冤狀祈葬遺骸於高原達官許之復投于井明日為出其骸以葬其怪遂絕今猶呼樂官井即當時驛舍所在云

湯泉在城東六十里上元縣神泉鄉湯山其處有聖湯
延祥院舊凡十所今存者六

事跡吳郡錄曰江寧縣有湯山出溫泉二所可以治
疾 張勃吳錄曰丹陽江寧縣有湯山出溫泉三所

宋劉義恭湯泉銘云秦都壯溫谷漢京麗湯泉炎
德資遠液暄波起斯源 石邁古跡編云鴈門山北

有湯泉去都七十里用以洗浴治瘡飲之已腸胃冷
疾齊時有老沙門語彼村人云此鑊湯之衝也

寺中前後

留題甚衆惟元祐間周公沔詩最為警拔鴈門泉水
熱於湯清淨還從古道場應笑驪山山下水至今猶
帶粉脂香
刻石見存

忠孝泉近忠孝亭

事跡武舉狀元周虎有記

馬軍行司公字在建業西門之裏東距冶城伊邇前

人規撫殊未易及惟西北一隅獨無渚水之地鬱攸
之戒每用惴焉暇日因續西園四望亭之北為軒三
楹即簷之涯鑿池方十有六丈以受衆溜以備不測
穴地不四五尺偏於地心得泉津津從而深之則泓
紆隨溢清冷而甘香以之淪茗滌煩頗勝他水亦可
異也思有以名之而不得一日引睇冶城之顛有屋
孤起諏之則晉將軍卞壺望之墓傍之舍所謂忠孝
亭者是已嗟乎忠孝之於人與生俱生夫人固有之

卞氏一門顧得擅此名於天地間耶方典午不競官爵自尊品流自高紛如也至俯首一意惟國之憂惟君之徇死生禍福不復吾計如望之者凡幾人父死國難子死父難蓋六朝以來曠未之聞則謂父忠臣謂子孝子可無愧裴母之言矣路有貪泉行道之人恥而不飲虎也何幸雖得官臺麓而食息起處乃隣英靈於千載之上且新泉之出與忠孝一亭下上適相近可不挹望之之高風仰望之之遺烈託忠孝之美名復皇皇乎他求哉於是乎遂名其泉曰忠孝庶後之飲此水者不懷行道之疑而望之之流芳汲之則在云嘉定歲庚午冬十月臨淮周虎叔子記并書

玉兔泉在府學東廊前

事跡秦丞相檜未仕時宿學夜見白兔入地使人掘

之一丈許得泉檜既入仕設井欄鐫石篆書玉兔泉三字

一人泉在蔣山北高峯絕頂古定林寺後僅容一勺挹

之不竭自山下至泉五里

章望之詩云一人泉在此山顛萬人可飲聞舊言顧我無

人試此水盛夏獨飲南風前

道光泉在蔣山之西梁靈曜寺之前

事跡熙寧八年僧道光披榛莽得泉深五尺穴竹引注寺中由嶺至寺凡三百步王荊公手植二松于其

傍其後道光又得二泉合為一派主寺者作屋覆於

其上名曰蒙亭以此泉得之道光故名道光泉

王荆公詩

籀龍帶雨繞山行注遠投深靜有聲雲漏滴槽朝自暖虹垂齋鑊午還晴銅瓶各滿幽人意玉甃因高正
士名神力可嗟妨智巧桔槔零落任苔生

宋熙泉在蔣山寶公塔之西有宋熙寺基基之左有泉
因名宋熙泉今蔣山興國寺日用皆此泉也

喜客泉在茅山棲真觀南客至則涌沸而起

舊志

事跡句曲三茅山記喜客泉在大茅北垂方數尺客

至即沸故以為名

漫塘劉莘詩物我本忘情無情惟止水底事山中泉客來如有喜悠

然鏡面平條爾魚眼生少焉開笑靨似與客逢迎客喜泉豈知泉笑客何有邂逅深山中聊結忘情友

深居韋去非次韻白雲在空山丹光照屋水仙人跡如掃客至泉輒喜世路多不平箇中太清生政以靜

自怡亦與凡將迎風波處處息坎離
人人有要使到此蹤盡作蓬瀛友

撫掌泉在茅山崇壽觀前雖旱不涸舊記云在鴻禧院東聞擊掌之聲涌出如沸其味甚佳冬時常暖亦呼為冬溫泉

白騎泉在城北十五里石邁古跡編曰吳大帝時蔣帝

乘白馬執白羽扇見形于此馬跑地成泉因以名之其
其泉在騎亭山之側屬上元縣慈仁鄉

白乳泉在攝山棲霞寺千佛嶺下昔因人伐木始見石
壁上刻隸書六大字曰白乳泉試茶亭不知得名於何
人

陳隆泉石邁古跡編曰隸上元縣丹陽鄉絳巖山之北
父老相傳昔有陳隆道人嘗結茅其側其泉清澈甘冷
繞山十餘泉皆所不及建炎中居民避難山中取給此

泉泉之東有屋基平坦無石莫知所因

田公泉在茅山玉晨觀東南一里亦呼柳谷泉

舊志

事跡真誥定錄言華陽雷平山有田公泉飲之除腹
中三虫與隱泉水同味云是玉沙之流津也用以浣
衣不用灰以此為異

玉液泉舊記云在茅山崇壽觀後山罡上路西畔仙人
捧石北泉若乳色甘而香能去腹中諸疾

海眼泉舊記云在揚尚書山房常時泉涌能應海潮在

積金中茅之西今元符宮西園是也

諸水

鍾山水

事跡李衛公浮槎山水記云李侯以鎮東留後出守廬州因游金陵蔣山飲其水既又登浮槎至其上有石池涓涓可愛蓋陸羽所謂乳泉漫流者飲之甘則鍾山水與浮槎之水其味同也

石頭城下水

事跡中朝故事云李德裕博達居廊廟日有親知奉使于京口李曰還日金山下揚子江中零泉水與取一壺來其人舉棹日醉而忘之泛舟至石頭下方憶乃汲一瓶于江中歸京獻之李公飲後訝歎非常曰江表水味異于頃歲矣此頗似建鄴石城下水其人謝過不隱也

八功德水在蔣山悟真庵後因梁天監得名

事跡天聖記云

鍾山之陽有泉曰八功德梁天監中有胡僧曇隱飛錫寓止修行有一龐

睂叟相謂曰予山龍也知師渴飲功德池措之無難
矣人與口減一沼沸成深僅盈尋廣可倍丈浪井不
鑿醴泉無源水旱若初澄撓一色厥後西僧繼至云
本域八池一已留矣此味大較相類豈非竭彼盈此
乎一清二冷三香四柔五甘六淨七不饅八蠲痾又
其效也夫姜詩孝聞獲淵開而鯉躍貳師誠至因劍
刺以流飛義有激而相求物何遠而不應向非兼濟
則為怪力是泉也方外淨因寰中美利矧其靈者安
可忽諸世故流離滋液長在惜其風雨不庇荆蕪四
侵寂寥山阿孰為起廢史館學士蘭陵蕭公貫以已
俸作亭甃版石八自南康購至楹柱四下東府所成
鑿崖以審曲積土以端術奢不至侈歸然獨存仍練
僧結廬於前以掌之庶幾便民汲息客游非有徵於
妄福也承奉郎守大理寺丞知上元縣事梅摯記

嘉定記云

八功德水鍾山之勝也亭久弗葺編修鍾
公建臺之明年元正之三日率僚屬為國

祈年於寶公味靈源之甘冽慨棟宇之湫陋圖殿而
新之鳩工度材斲巖拓基增庫為高不擾於民不侈
厥費輪奐翼然所以護神淵而綿美澤也自有此山
即有此水梁天監中始得名我宋天聖中史館蕭公
始亭其上迄今百一十有七年復宏舊觀闢幽發奇
脩前有待則嗣而葺之以沾溉後人滋福于無疆是
山龍沸出之祥鍾公重建之美意也公名將之字仲
山長沙人自樞屬三持節為此來今著籍元士是役
也俾其屬浚都趙師縉董之因識題詠楊虞部詩翠
其歲月嘉定改元上己日記并書題詠楊虞部詩翠
枯一泓甘滑飲醍醐高僧到此聞絲竹還有金鱗對
躍無注云高僧曇隱遊行于此忽聞金石絲竹之音
俄見清泉一泓瑩澈甘滑有積年疾者飲之皆愈
王半山詩寒雲靜如痴寒日慘如威解鞍寒山中共
坐寒泉側新甘出短綆一酌煩可滌仰攀青青柳木
醴何所直念方與子違懽恍夜不眠起視明星高

整駕出東阡
聊為山水遊
以寫我心悵
知子不餽糟
相與酌雲泉
曾極詩數斛
供厨替八珍
穿松漱石
瑩心神中涵
百衲烟霞色
不染齊梁歌
舞塵馬野
亭詩鍾山有
嶺號屏風碧
石青林一徑
通聽得山腰
鳴陸績看來
海眼淨沖湫
初嘗但得煩
心解再飲能
令百慮空軟
美輕清無限
好經中所說
正相同

曲水晉海西公於鍾山立流杯曲水延百僚

事跡水經注曰舊樂遊苑宋元嘉十一年以其地為

曲水武帝引流轉酌賦詩裴子野宋畧曰文帝元嘉

十一年三月丙申禊飲於樂遊苑且祖道江夏王義

恭衡陽王義季有詔賦詩

顏延年應詔讌曲水詩道
隱未形治彰既亂帝迹懸

衡皇流共貫惟主創物永錫洪算仁固開周義高登
漢祚融世哲業光列聖太上正位天臨海鏡制以化
裁樹之形性惠浸萌生信及翔泳崇虛非徵積寶莫
尚豈伊人和寶靈所貺日完其朔月不掩望航琛越
水輦賁踰嶂帝體麗明儀辰作貳君彼東朝金昭玉
粹德自潤身禮不愆罷柔中淵映芳猷蘭祕昔在文
昭今惟武穆於赫王宰方旦居叔有晬睿蕃爰履奠
牧寧極和鈞屏京維服肅魄雙交月氣參變開榮濯
澤舒虹燦電化際無間皇情爰眷伊思鎬飲每惟洛
宴郊饒有壇君舉有禮幙惟蘭甸畫流高陞分庭薦
樂析波浮醴豫同夏諺事兼出濟仰閱豐施降惟微
物三姑儲隸五塵朝散途泰命屯恩充報屈有悔可
悛滯瑕難拂蕭穎士蓬池袂飲序曰晉氏中朝始
參燕胥之樂江左宋齊又間以文詠風流遂遠蔚為
盛集蕭子範家園三日賦有云聊潔新而濯故式
東流之前軌右瞻則青溪千仞北顧則龍盤秀出

溧水一名瀨水在溧陽西北四十里

事跡前漢地理志云溧水出南湖 祥符圖經瀨水

西承丹陽湖東入長塘湖益丹陽湖即南湖也嘗考

其詳固城春秋時吳瀨渚縣

案勝公廟記

漢溧陽縣治在

焉

隋開皇十一年割溧陽之西置溧水縣固城在今溧陽縣之西溧水縣界紹興中得後漢溧陽校官

碑於固城湖之傍故知其為漢縣治丹陽湖在其南故曰南湖溧水出

南湖而東縣在水之北北曰陽故名溧陽自東壩既成於是丹陽湖水不復通本縣界然古溧水之出於

丹陽湖明矣今縣西北有水源出曹山逕溧水縣界東流入本縣界合于永陽江六朝事跡編及乾道建康志皆指曹山之水為溧源非也 元和郡縣志溧

水在溧陽縣南六里蓋唐溧陽縣治即今之舊縣也

溧水東流為永陽江江上有渚曰瀨渚即伍子胥

乞食投金處故又曰投金瀨自瀨渚東流為瀨溪

鄉民

記為瀨溪

入長塘湖一派東流為吳王漕

吳王漕者楊行密時漕運所行

也或以為春秋時之吳王

真誥云夫至貞者萬乘不能激其名

投金湫女是也陶隱居注云金湫女是子胥所逢浣
紗於湫水之陽者後既投金以報之故謂之金湫詳
見李白所作瀨女碑

吳漕水源出湫水縣東廬山東南流入吳漕過白馬橋
馬沈二港港下入丹陽湖

太山水源出湫水縣南流入固城湖經五堰東入湫陽
縣三塔港

亭水源在句容縣北三十里亭山南遶縣城東與未山

湖水合流下百堽堰入秦淮

汝南灣在城東八里當秦淮曲折處

舊志

事跡晉汝南王渡江因家於此遂名汝南灣齊陸慧
曉劉瓛宅並在灣前又有東冶亭在灣之東南乃晉
太元中餞送之所齊陸慧曉清介自立張緒目為
江東裴樂家於灣前張融自稱天地逸民牽船住岸
卜以隣居劉瓛弟璡字子敬二人並居其間水有異
味時酌飲之至今取此水釀酒極佳事見覽古詩注

楊虞部詩汝南王昔過江東北地名將汝海同玉解
酌來人易醉有時人面照花紅馬野亭詩當時只
號江南灣後有三人住此間自謂逸民須隱約並稱
賢士想高閒祇緣水味都殊異且欲隣居數往還好
是有時相就飲不
妨鐺脚對青山

桐林灣在秦淮南南逼府城北臨淮水岸舊植桐甚繁故
以名東北有浮航即長樂橋也

明月灣在句容縣西南一里通淮謝安石曾月夜泛舟
垂釣今釣基尚存

烏龍潭在城北鍾山鄉永慶寺之前水旱祈禱屢應按

輿地志云宋元嘉末有黑龍見于玄武湖側今潭近湖
所疑即當時龍見之處

葛蒲潭在句容縣仙人坊許長史居此學道又顧著作
山房多產葛蒲一寸九節

投金瀨在溧陽縣西北四十里源出曹姥山經溧水縣
界南流為潁陽江江上有渚曰瀨渚

事跡吳越春秋云伍子胥奔吳至溧陽溧陽女子擊
縹瀨水之上子胥跪而乞餐女子簞食壺漿而飲之

子胥餐而去謂女子曰掩子壺漿勿令其露女子曰
行矣子胥行五步還顧女子已自投於瀨中後子胥
伐楚師還過溧陽瀨上長嘆曰吾嘗飢於此乞食而
殺一婦人欲報之百金而不知其家乃投金水中而
去後有姬行哭而來曰吾女年三十不嫁擊縲于此
遇窮人舖之恐事泄投水而死故號此水投金瀨史
記云子胥米至吳而疾止中道乞食張勃曰子胥乞
食處在丹陽溧陽縣唐書音訓曰投金瀨今潁陽江

上伍子胥嘗乞食遇婦人餬之後欲報恩求之不獲
乃投百金於此瀨上有正義女廟李白遊溧陽北湖
望瓦屋山懷古詩云聞有正義女振窮溧水灣

投書渚今在城西

事跡晉史殷羨建元中為豫章太守去郡人多附書
一百餘封行至江邊石頭渚以書擲水中祝曰沈者
自沈浮者自浮殷洪喬非致書郵

艤澳在南城長千里水出婁湖下入秦淮深丈餘冬春

不涸

舊志

事跡輿地志云梁武帝所開在光宅寺東二百五十步其寺武帝舊宅帝從城歸宅儀仗舟車駢戢塞路開以藏船

巖洞

天開巖在攝山棲霞寺之後去寺三里石多特立中有石礪相向其直如截殆非人力所至故以天開名其巖巖之左有張稚圭祖無擇諸公題字

道卿巖在八功德水之後半嶺間可容數人慶歷中知府葉公清臣嘗領客來遊公字道卿故名

石城洞一名龍洞在城西一里二百步石頭西嶺下臨

大江當蘄絕之處有洞戶真誥云此小有洞天之南門

也俗呼為龍洞口

曾極詩江流遠引背烟嵐平陸何年重舉帆斷岸揅天危欲墜六朝龍去

祇空岩

華陽洞在茅山側三茅二許俱得道於此洞其洞門五

三門顯二門隱

事跡茅山記云華陽西南有二洞其西在崇壽觀後
其南在元符宮東國朝每投金龍玉簡於此 六朝
記云十大洞天之第八名中有金壇長百丈復有玉
碣皆載神仙祕事三茅二許俱得道於此靈異至多
盡見於陶貞白華陽頌 真誥曰金陵句容之句曲

洞為第八洞天又曰句曲地肥土良水清謂之華陽

洞天可以度世種民是處五災不干

游九言詞河漢
徹碧霄晴九華

仙子到凡塵涼夜山頭吹玉笛織雲卷盡月分明清
露濕草晶熒起看大地聚瑤瓊下界千門人寂寂空

山夜靜海波聲仙子去渺雲程天風杳杳珮環清回
望九州烟霧白千山月落影交橫林通叟詩華陽
山雨拂輕塵獨步烟霞訪隱真笑傲太平雲外客安
閑清世夢中身金章名重人稱貴布褐才高道不貧
吟罷洞天風正淡
自知凡骨定逢人

茅洞在大茅峰南

事跡茅山記云洞在大茅山前從玉液泉為正路洞
前亦有石壇洞內有石鐘磬直下可行七八里能容
千二百人其內流水不絕色若染藍石澗潺湲可愛
路通無窮但險峻難涉耳又云外有古壇內有石鐘

磬旌節人物皆石入者非人必見異物

越翳王洞在句容縣乾元觀南

事跡翳於句踐四世孫葬句容大橫山下

金牛洞在句容崇壽觀東

事跡秦時採金獲金牛為女子所觸遂擲而出跡著

於石

洲浦

磯汀夾沙並附

白鷺洲在城之西與城相望周迴一十五里 舊志

事跡鄺道元水經注江寧之新林浦西對白鷺洲

丹陽記曰白鷺洲在縣西三里洲在大江中多聚白

鷺因以名之 國朝開寶七年王師問罪江南曹彬

等破南唐兵五千於白鷺洲即此地 建炎末敵騎

侵軼江南回至江口聞王師將以海舟中流邀其歸

路遂用牛犁等於白鷺洲一夜鑿一小河乘輕舫而

走詳見新河

李太白詩云三山半落青天外二水中分白鷺洲又宿白鷺洲送楊江寧詩云

朝別朱雀門

暮宿白鷺洲送殷叔云白鷺洲前月天明送客回 徐鉉有題白鷺洲江鷗詩云白鷺洲邊

江路斜輕鷗接翼滿平沙 曾極詩江水悠悠綠染
衣淮山渺渺翠成團南朝鷺序歸何處惟見滄洲白
鳥飛 楊備詩春信風生晚汛潮印沙羣鷺立還翹
凭高一片遮人眼蘆葉叢邊雪未銷 劉遇詩一聲
雷鼓挾風威頃刻衝波沒釣磯行客驚看銀漢落陽
侯擎起玉山飛蛟龍便爾爭先化鷗鷺茫然失所依
安得長竿入吾手翩然東
海釣鰲歸餘見白鷺亭下

馬昂洲在城西北周迴一十五里 舊志

事跡寰宇記云馬昂洲在縣北二十三里 南徐州

記臨沂縣北有馬昂洲晉元帝渡江牧馬於此因以
名之 梁書南兖州刺史南康王會理前青冀二州

刺史湘潭侯退西昌世子或率兵三萬至馬昂洲即

此處

陳軒金陵集王祖道詩云
石頭虎踞海洲岸馬昂槽

新洲一名薛家洲去城北四十里今幕府山相對有上

新洲下新洲

事跡吳志太平元年朱據欲討孫綝綝遣孫憲等以

舟兵逆據江都獲據於新洲 晉隆安五年海賊孫

恩向京師聞譙王尚之在建康復聞劉牢之已還至

新洲不敢進而去 南史宋武帝微時貧陋過甚自

往新洲伐荻有衲布衣袂等皆敬皇后手自作既貴
以付會稽公主曰後世有驕奢不節者可以此衣示
之 劉宋武帝伐荻新洲時見大蛇長數丈射之傷
明日復至洲裏聞有杵臼聲往覘之童子數人皆新
衣於洲中搗藥問其故答曰王為劉寄奴所射合藥
敷之帝曰王神何不殺之答曰寄奴王者不可殺帝
叱之皆散收藥而反 祥符圖經云隋末始漲故名

新洲

舟子洲在城南隅周迴七里 舊志

事跡梁天監十二年以朱雀門東北淮水紆曲數有水患又舟行旋衝太廟灣乃鑿通中央為舟子洲諸郡秀才上計憇止于此

概洲在城東北七十五里周迴三十八里南徐州記云石壠山北江中有洲今百姓於洲上概種所收倍於平陸

茄子洲在城西南十三里周迴一十二里 舊志

事跡溫嶠陶侃赴援討蘇峻侃泊茄子洲郗鑒自廣陵來會於此 寰宇記云茄子洲夏日堪泊船冬月淺涸永昌之初其洲忽一日崩陷數里其形曲折作九灣

烈洲在城西南七十里吳舊津所也內有小河可泊船商客多停此以避烈風故以為名

舊志

事跡伏滔北征賦亦謂之栗洲上有小山其形似栗因名之 晉永昌元年王敦舉兵至栗洲戴若思劉

隗等六軍敗績 寰宇記云王濬伐吳嘗宿於此簡
文為相亦會桓玄於此 世說云桓宣武在南州與
會稽王會於溧洲于時漾舟江側謝公亦在坐狂風
忽起波浪鼓涌非人力所制桓公有懼色會稽亦微
異惟謝公怡然自若頃間風止桓問謝曰向那得不
懼謝徐笑答曰何有三才同盡理 安帝隆安六年
桓玄舉兵東下司馬元顯大懼以劉牢之為前鋒軍
溧洲參軍劉裕請擊之牢之不許與元交通

舊志載
宋武帝

義師討逆劉牢之屯此洲者誤也劉牢之屯此洲時
宋武帝為牢之參軍元興三年方舉義兵於京口討
桓作舊志者太元九年桓冲為荊州刺史文武祖道
殆未考耳

謝安自送至溧洲並此處也

雞距洲在城西南三十五里周迴三十里

烏沙洲在城西南三十五里周迴二十里

楊林洲在城西南二十五里周迴一十一里

木瓜洲在城西南二十八里周迴二十里

浮洲在城西南八十里周迴二十五里

龍潭洲在城西南九十五里周迴一十五里

合興洲在城西南九十五里周迴一十二里

鰻鰲洲在城西南七十里周迴三十五里西對和州烏江縣以水多鰻鰲因為名

董雲洲在城西南一十五里西有小江名曰澧江故名澧江場其上有田五百頃

丁翁洲在城西南二十五里周迴一十五里昔有隱士晦其名惟稱丁翁居洲上故為名

薛槍洲在城西南三十五里周迴一十七里南唐保大
中治宮室取材於上江成巨筏至此時會潮退為浮沙
所沒漲成洲渚至國朝景德三年南岸潰出大枋木二
十餘條

落星洲在城西南三十里周迴一十里有小阜高數
丈舊圖經云星隕所化也

魚袋洲在城西南八十里周迴五里形如佩魚因為
名

烏江洲在城西南六十里周迴一十五里接烏江縣西界

迷子洲在城西南四十里周迴三十里

王荊公次韻葉致遠詩云迷子

山前漲一洲宋人圖志失編收

張公洲在城西南五里周迴三里

舊志

事跡梁太清二年豫州刺史裴之高等舟師二萬次

張公洲 陳霸先擊破侯子鑒師于張公洲 梁書

王僧辯陳霸先之破侯景也耀軍於張公洲高旗巨

艦過江蔽日乘潮順流景登石頭城而覩之不悅曰
彼軍有如是不易敵也

蔡洲今名蔡家沙在城西南一十二里周迴五十五里
舊志

事跡按晉史王敦在石頭欲禁私伐蔡洲荻以問羣
下時王師新敗士氣震懼莫敢異議溫嶠獨曰中原
有菽庶人採之百姓不足君孰與足若禁人樵伐未
知其可 成帝時陶侃討蘇峻與溫嶠庾亮等率舟

師四萬旗鼓百里次於蔡洲六日諸軍盡會石頭城
西北 盧循作亂戰士十餘萬舟艦數百里連旗而
下劉裕登石頭以望循軍曰賊自新亭直上且將避
之若回泊蔡洲此成擒 時徐道覆請於新亭焚舟
而戰循曰不然不如披甲蔡洲以待之初劉裕望見
船向新亭有懼色及見回泊蔡洲喜曰賊落吾手也
遂率兵進戰縛以大筏因風逼之大破循軍於江中
循遁走 侯景次臺城裴之高援兵至後渚結陣於蔡

洲景分屯南岸 大寶三年陳霸先討侯景二月大
軍進姑孰先鋒次蔡洲即此也

長命洲梁武帝放生之所也在石頭城前

舊志

事跡梁武帝市鵝鴨雞豚之屬放此洲名為長命洲
置戶十家常以粟穀餵飼歲合千數而為狐狸所食
及掌戶竊而烹者各半 輿地志云魏使李恕來聘

帝時於此放生問恕曰北主頗知此事乎對曰魏國

不殺亦不放帝無以應之

楊虞部詩梁武慈悲不鼎烹蒙恩泰養亦虛名狐狸

口腹應潛飽就死多於日放生馬野亭詩如何長
命作洲名梁武當時此放生鵝鴨成羣如市肆雞豚
無數似屯營豈知半被狸奴食寧免私為鶴
戶烹不殺自然能不放却將實相博虛名

江乘浦在城西北一十七里

舊志

事跡秦始皇東遊於此渡江南徐州記江乘縣西

二里有大浦發源於石城山東入大江因縣為名

吳徐盛作疑城自石頭至江乘晉蔡謨自土山至

江乘鎮守八所城壘凡十一處

蟹浦在城西北一十六里

舊志

事跡輿地志云白下城西南有蟹浦源出鍾山北流九里入大江齊崔慧景軍散走單騎至蟹浦投漁人大叔榮之榮之故為慧景門人時為蟹浦戍謂之曰吾以樂賜汝汝為吾覓酒既而為榮之所斬以頭內籃中送都

鄱陽浦在石城西上通秦淮下入馬昂洲九里達於江乘舊經云梁鄱陽王嘗於此置屯田因以為名

牧馬浦在城東南三十九里案丹陽記牧馬亭東南一

里有牧馬浦晉永和中所置流入秦淮浦上舊有橋謂之牧馬橋南朝放牧多在此

慈蠶浦在城東十里濶五十步深一丈下通大江

京江浦在城東北五十一里濶五丈深一丈下入大江

大同浦在城東北五十二里濶五丈深九尺下入大江

小同浦在城東北六十七里濶五丈深一丈下入大江

泉水浦在城西北二十五里濶五丈深九尺源出白下

山南流一十二里入秦淮

鍾浦在城東一十五里濶四丈深八尺源出鍾山南流
七里入於秦淮考之金陵圖其地有鍾浦橋

同夏浦在城東一十五里濶五丈深七尺南入秦淮浦
在廢同夏縣南因以為名

羅落浦在城東北六十里濶四丈深八尺合於攝湖流
十二里入大江宋武帝進至羅落橋即此地也

白社浦在城東北二十五里案金陵故事云發源鍾山
西注秦淮

查浦在石頭南上十里

舊志

事跡建康實錄晉陶侃屯查浦李陽與蘇逸戰於查浦盧循犯建業宋武帝柵石頭斷查浦以拒之皆此地也

新林浦在城西南二十里濶三丈深一丈長一十二里

舊經云三十里

源出牛頭山西七里入大江秋夏勝五十石舟

春冬涸

舊志

事跡鄠道元水經注江寧之新林浦西對白鷺洲

梁武帝置江漳苑自新亭鑿渠以通新林浦又起義兵擒新亭城主大軍遂次新林侯景園臺城柳仲禮韋粲合軍屯新林皆此地也互見新亭

龍藏浦在舟子洲岸西南古曲秦淮是也互見秦淮

板橋浦在城西南三十里濶三丈五尺深九尺下入大

江舊志

事跡李白有秋夜板橋浦獨酌懷謝朓詩

天上何所有迢迢白

玉繩斜低建章
閣耿耿對金陵

江寧浦在城南七十五里源出太平州當塗縣界長三十里濶七尺深一丈二尺溉田一百二十頃夏秋勝三

百石舟春冬勝一百石

舊志

事跡梁末徐嗣徽任約領齊兵萬人還據石頭陳高祖遣兵往江寧據要險以斷賊路賊水步不敢進頓

江寧浦口遣侯安都領水軍襲破之

王荆公有江寧夾口詩五首茅

屋滄洲一酒旗午烟孤起

隔林炊江清日暖蘆花轉

恰似春風柳絮時

月墮浮雲水捲空滄洲夜沂五

更風北山草木何由見夢盡春燈展轉中

鍾山咫尺被雲埋何況南樓與北齋昨夜月明江上夢遙隨

潮水到秦淮 日西江口落征帆却望城樓淚滿衫
從此夢歸無別路破頭山北北山南落帆江口月
黃昏小店無燈欲閉門半出岸
沙楓欲死繫船猶有去年痕

秣陵浦在城南五十里濶一十丈長一十里深一丈一
尺溉田四十頃輿地志云浦以舊縣為名源出龍山北
流一十里入葛塘湖又一十里入長溪合秦淮秋夏勝
三百石舟春冬勝一百五十石

三山磯在城西南七十五里 舊志

事跡翰府名談曰陳公堯咨泊舟三山有老叟曰來

日午時有大風舟行必覆宜避之來日天晴同行舟
皆離岸公託以事日午黑雲起天末大風暴至折木
飛砂怒濤若山行舟皆溺公驚歎又見前叟曰某江
之遊奕將也公他日當位宰相固當奉告公曰何以
報德叟曰吾本不求報貴人所至龍神理當衛護願
得金光明經一部乘其力薄得遷職公許之至京以
金光明經三部遣人至三山磯投之夢前叟曰本止
祈一部公賜以三今連陞數職再拜而去

蚶蜆磯在城西

舊志

事跡南唐書云汪台符上書陳民間利病十餘條烈祖善之而宋齊丘疾其才因使親信誘台符痛飲推沈石城蚶蜆磯下

欒家磯在城西北二十五里上元縣金陵鄉長慶村之西

事跡國朝實錄熙寧五年詔賜江東路轉運使韓鐸新提點刑獄張稚圭詔書獎諭仍賜銀絹以提舉開

江寧府張公凸上樂家磯馬鞍山河道也


九里汀在城東南五十里東下入秦淮溉田五百二十

頃舊志

事跡建康實錄吳寶鼎元年後主在武昌冬十月永安山賊施坦等反劫後主弟永安侯謙為主出烏程取故太子和陵上鼓吹曲蓋北入建業萬餘人丁固諸葛靚等逆討於九里河即此處也

硎砂夾在城西南七十里

事跡張文潛有硯砂夾阻風詩云
大江春風浪如屋客舟迎



景定建康志卷十九

欽定四庫全書

史部

景定建康志卷二十一

詳校官監察御史_臣沈孫璉

檢討_臣德生覆勘

總校官檢討_臣何思鈞

校對官中書_臣張曾炳

謄錄監生_臣陳燦

欽定四庫全書

景定建康志卷二十

宋 周應合 撰

城闕志一

建邦啓土既勤垣墉設險守國深溝高壘惟典神天祇肅廟社相協厥居若作室家宜其湮鬱臺池共樂皆宜有志金陵城郭肇於越楚廣乎六朝至我宋而大且久往古來今不細沿革有一居而數更所者矣有一所而數更名者矣新名立而舊者沒後迹遷而前者譌志有

弗詳曷信而証如昆明鑿而鎬都為池隋城立而漢京
為苑固不可以古而為今唐已為晉而詩存唐邨已為
衛而詩存邨亦奚可以今而忘古哉乃參古今作城闕
志

古城郭

古固城春秋時吳所築也在今溧陽縣之西溧水縣界
周迴七里餘其故址尚存亦名平陵城

考證案勝公廟記云固城吳時瀨渚縣也楚靈王與

吳戰吳軍不利遂陷此城吳乃移瀨渚於溧陽南十里改為陵平縣平王立使蘇廸為將戰于吳吳軍敗收吳陵平縣改為平陵縣自平王聽費無極佞言伍負奔吳闔閭用為將舉軍破楚固城宮殿逾月烟焰不滅其城遂廢 笠澤叢書云溧陽昔為平陵縣縣南有故平陵城即吳固城所改也 李賀記為兒時在溧陽聞白頭書佐言孟東野貞元中為溧陽尉溧陽昔為平陵縣縣之南五里則有投金瀨瀨之南八

里則有故平陵城周千餘步基址才高三四尺而草木甚盛率多大櫟叢篠蒙翳如鴻如洞其地窪下積水沮洳深處可活魚鱉幽邃可喜東野得之志歸紹興中得後漢校官碑於溧陽固城之旁知其為漢縣治案此城最古在越城楚邑之先不書于表以其在縣境耳志城郭之首以存古

古越城一名范蠡城案宮苑記周元王四年越相范蠡所築在今瓦棺寺東南國門橋西北圖經云城周迴二

里八十步在秣陵縣長干里今江寧縣尉廨後遺址猶存俗呼為越臺

舊志

考證金陵故事云周元王四年范蠡佐越滅吳欲圖伯中國立城於金陵以彊威勢

郡國志云在縣南

六里東甌越王所立吳王濞敗保此城後走丹徒

晉王敦王含以水陸五萬逼淮溫嶠燒朱雀航以挫

其鋒遂潛師渡水大破含軍于越城

南史盧循犯

建康劉裕恐其侵軼用虞丘進計伐木柵石頭城修

治越城

齊崔慧景寇建業蕭懿入援自採石濟岸

遁越城

梁武義師次新林遣王茂據越即此地

嘉祐實錄注云越王築城江上鎮今淮水南一里半

廢越城是也案越絕書其城越范蠡所築城東南角

近固城望國門橋西北即吳牙門將軍陸機宅故機

入晉作懷舊賦西望東城之紆餘即此城在三井岡

東南一里今瓦棺寺閣在岡東偏也 事跡云今南

門外有越臺與天禧寺相對見作軍寨處是也近時

詩人指越臺為越女取越土築臺者非也

楚金陵邑城威王滅越私吳越之富擅江海之利置金陵邑於石頭及懷王為秦所滅至漢高帝時封韓信于楚鄣郡屬焉六年廢

舊志

考證周顯王三十六年越為楚所滅乃因山立號置金陵邑今石頭城是也楚威王後一百一十餘年當秦始皇二十四年秦滅楚兼諸侯分天下作三十六郡以金陵為鄣郡楚亡後一十三年當始皇三十七

年乃改金陵邑為秣陵縣詳見郡縣及地名釋

吳石頭城已載山阜門石城山下

丹陽郡城案宮苑記在長樂橋東一里南臨大路城周一頃開東南北門漢元封二年置丹陽郡至晉太康中始築城宋齊梁陳因之不改

舊志

考證漢志置丹陽郡先治宛陵建安十三年孫權分為新都郡二十六年權始置丹陽郡自宛陵治建業永安中分置故鄣郡丹陽所領惟溧陽以北六縣晉

太康元年改建業復為秣陵置江寧縣唐初廢為州
天寶元年復置至德二載析置江寧郡 元和郡國
志丹陽郡故城在今江寧縣東南 蔡宗旦金陵賦
注云古圖長樂橋東一里今桐林灣軍寨處

古都城案宮苑記吳大帝所築周迴二十里一十九步
在淮水北五里黃龍元年自武昌徙都晉元帝初過江
不改其舊宋齊梁陳皆都之宋世宮門外六門城設竹
籬至齊高帝建元元年有發白虎樽言白門三重門竹

籬穿不全上感其言改立都牆本紀建元二年立六門都牆是也其後增立為十二門云

舊志

考證案宮室記吳大帝遷都建鄴有曰太初宮者即長沙王故府徙武昌宮室材瓦所繕也有曰臺城蓋宮省之所寓也有曰東府蓋宰相之所居也有曰西州蓋諸王之所宅也有曰倉城蓋儲蓄之所在也皆不出都城之內輿地志曰晉琅邪王渡江鎮建鄴因吳舊都修而居之宋齊而下宮室有因有革而都城

不改 東南利便書曰孫權雖居石頭以扼江險然其都邑則在建鄴歷代所謂都城也東晉及齊梁因之雖時有改築而其經畫皆吳之舊 隋既平陳此城皆毀今之都城非舊也

臺城一曰苑城本吳後苑城晉成帝咸和中新宮成名建康宮即今所謂臺城也在上元縣東北五里周八里濠濶五丈深七尺今胭脂井南至高陽樓基二里即古臺城之地盡為軍營及居民蔬圃 舊志

考證實錄注苑城即建康宮城吳之後苑地一名建
平園又云臺城南正中大司馬門南對宣陽門相去
二里宣陽即苑城則臺城在苑城內明矣 宮苑記
云古臺城即建康宮城本吳後苑城晉咸和中修繕
為宮 輿地志云都城南正中宣陽門對苑城門其
南直朱雀門正北面宮城無別門乃知苑城即宮城
在都城內近北明矣臺城南面開四門北面二門東
西面各一門宮城內有兩重宮牆周迴五百七十八

丈南面開二門北面二門東西面各一門第三重宮
牆南面一門東西面各一門又云同泰寺與臺城隔
路今法寶寺及圓寂寺即古同泰寺基故法寶亦名
臺城院以此考之法寶圓寂寺之南蓋古臺城也

晉書成帝時蘇峻作亂焚燒宮室溫嶠以下咸議遷
都惟王導固爭不許咸和五年作新宮始繕苑城六
年遷於新宮即此城也 此城唐末尚存唐史張雄
傳云使別將趙暉據上元暉負其才欲治臺城為府

者是也 梅摯訪臺城遺址詩云寺僧日扣粧鐘起
園客時翻輦路耕 蔡宗旦金陵賦云登高陽之危
樓想苑城之舊規

東府城晉安帝義熙十年冬城東府在青溪橋東南臨
淮水周三里九十步去臺四里簡文為王時舊第後為
會稽王道子宅道子錄尚書事以為治所時人呼為東
府其子元顯亦錄尚書事時謂道子為東錄元顯為西
錄西府車騎填湊東第門下可設雀羅東第即今東府

城也舊志

考證會稽王傳嬖人趙牙為道子開東第築山穿池
列樹竹木工用鉅萬帝嘗幸其宅謂道子曰府內有
山因得游矚甚善也然修飾太過非示天下以儉道
子謂牙曰上若知山是版築所作爾死矣牙曰公在
牙何敢死其城東北角有土山曰靈秀即牙所築也
宋武帝領揚州日築東府城以居彭城王義康文
帝元嘉中義康更開拓北墉浚西塹自後常為宰相

府第景和中嘗改為未央宮 明帝時建安王休仁

鎮東府訛言東城出天子帝懼殺休仁而常閉東府
不居桂陽王休範反車騎典籤茅恬開東府納賊

齊高帝封齊王以東府為齊宮 梁太清三年侯景

舉兵毀板女牆以輒甃為之紹泰末盡罹焚毀 陳

天嘉中更徙治今城東三里齊安寺西臨淮水陳亡

廢

西州城即古揚州城漢揚州治曲阿晉永嘉中遷於建

康王敦始為建康初立州城即此城也案建康實錄城所置西則冶城東則運瀆今天慶觀之東西州橋是一說石冰之亂焚燒府舍陳敏營孫氏故宮居之元帝初渡江即敏府創今城舊志

考證晉孝武太元末會稽王道子領揚州居東府故號此城為西州大明中以東府為諸王邸西州為丹陽尹治所謝安為時人所愛重及鎮新城盡室而行造汎海之裝欲須經畧稍定自江道還東雅志未就

遂遇疾篤上疏請旋旆詔遣還都聞當輿入西州門
自以本志不遂深自慨失及薨後安所知羊曇者輟
樂彌年行不由西州路嘗因石頭人醉扶路唱樂不
覺至州門左右曰此西州門曇悲感不已因慟哭而
去 宋徐羨之住西州高祖嘗思之即步出西掖門
往見焉 寰宇記云西州學者多未曉江寧府有東
府城城中有揚州廨而揚州在府西故時人號為東
府西州東府城之西門謂之西州門世說王丞相治

州廨按行而言曰我為何次道治此爾充少為王公所知是以發此嘆今西州也丹陽記曰揚州廨王氏所居諸葛恪則治建業晉自周浚至王仍吳舊王復領州牧及桓溫桓玄悉治王府王茂洪以及桓謙則在建康永嘉六年顧榮誅陳敏揚州刺史劉機治建康王氏代機元帝渡江居城府王便立州廨於此宋殷景仁既拜揚州羸疾遂篤上敕西州道上不得有車聲孝武時熒惑守南斗上盡廢西州舊館使西

陽王子尚移居東府城以厭之揚州別駕沈懷明曰
天道示變宜應之以德今雖廢西州恐無補也上不
從西州竟廢

冶城金陵有古冶城本吳冶鑄之地世說叙錄云丹陽
冶城去宮三里今天慶觀即其地舊志

考證晉元帝太興初以王導疾久方士戴洋云君本
命在申而申地有冶金火相爍不利遂移治于石頭城
東以其地為西園 晉成帝幸司徒府游觀西園徐

廣謂之冶城園是也 孝武帝太元十五年於城中
立寺以冶城為名 安帝元興三年以寺為苑廣起
樓榭飛閣複道延屬宮城謝安每與王羲之登之悠
然遐想有高世志 金陵故事導疾遷冶於縣東七
里六朝有東西冶每遇緊急出二冶囚徒 又有東
冶亭晉太元七年立在縣東八里為士大夫餞別之
所疑導疾時以古冶遷東西為二故王荊公詩云欲
望鍾山岑因知冶城路此謂東冶城也金陵故事又

有南冶六所少府一司徒二揚州二鎮軍一 晉史

庾公權重足傾王公庾公在石頭王公在冶城坐大風揚塵王公以扇拂塵曰元規塵汚人 梁紹泰

元年陳霸先使合州刺史徐度立柵於冶城 齊徐

嗣徽等攻冶城柵霸先將精甲自西明門出擊之嗣

徽大敗

琅邪城在江乘縣界晉元帝以琅邪王過江國人隨而居之因城焉在縣東北六十三里今句容縣琅邪鄉即

其地也 舊志

考證齊武帝永明元年移琅邪郡於白下大起樓觀
講武於此南徐州記云江乘南岸蒲洲津有琅邪然
則琅邪城與白下相通今句容縣有琅邪鄉蓋與江
乘縣界相接是蒲州津與白下皆有琅邪城也一在
上元縣金陵鄉西北去縣十四里乃白下之城或者
直以蒲州津城為白下非也 王隱晉書江乘南岸
有琅邪城立琅邪內史以治之 齊永明六年於琅

邪城講武習水步觀者傾都 王融從琅邪城講武

應詔詩云白日映丹羽頽霞文翠旃凌山炫組甲帶

水被戈船 謝朓有江孝嗣戍琅邪城詩 南史齊

王融傳云世祖欲北伐使毛惠秀畫漢武圖置琅邪

城射堂上每游幸必觀視焉

金城在城東二十五里吳築今上元縣金陵鄉地名金

城戍即其地 舊志

考證吳後主寶鼎二年以靈輿法駕迎神於明陵使

丞相陸凱奉三牲祭於近郊後主於金城門外露宿
明陵乃後主父故太子和陵也蔡宗旦金陵賦云遊
金城以愴然問種柳之何在笑吳王之信巫乃露宿
於門外 晉太興中王氏舉兵及將軍劉隗軍於金
城 初咸康中桓溫出鎮江東之金城後溫北伐經
金城見為琅邪時所種柳皆十圍因嘆曰木猶如此
人何以堪因攀枝執條泣然流涕楊修金城詩亦引
此為據晉中宗於金城置琅邪郡桓溫嘗為琅邪內

史至咸康七年出鎮金城今上元縣金陵鄉地名金城戍即其地

秣陵城在宮城南八里一百步小長干巷內梁宋北齊皆為秣陵故城跨淮立橋柵當是其地隋並入江寧

建鄴城晉太康三年分秣陵淮水北為建鄴舊城在吳冶城東詳見縣下

蔣州城杜佑通典隋平陳於石城置蔣州寰宇記輔公柘據江東用為揚州唐趙郡王孝恭平公柘又於其城

置揚州大都督後徙揚州於廣陵此城遂廢

五城有二其一在府城東南二十五里東晉時所築其一在石頭城唐德宗時所築

考證晉王敦敗王含錢鳳乃率餘黨自柵塘西置五城造營唐景雲中縣令陸彥恭於城側造橋渡淮水今五城渡是唐德宗狩梁州韓滉觀察江東西乃築石頭五城自京口至土山修塢壁起建鄴抵京樓雉相望詳見石頭城

檀城本謝玄之別墅太傅謝安與玄奕碁計勝處至宋屬檀道濟故名檀城圖經云在縣東八里今案建康實錄在墅城東八里非去縣八里也地圖謂之城子墅今清風鄉有城子沽在黃城橋之西即其地去府城四十里

白下城案圖經及寰宇記引輿地志云本江乘之白石壘也齊武帝以其地帶江山移琅邪居之唐武德元年罷金陵縣築城於此因其舊名曰白下貞觀七年復舊

治此地遂廢

舊志

考證唐地理志云武德三年更江寧曰歸化八年更歸化曰金陵九年更金陵曰白下隸潤州貞觀九年復更白下曰江寧前說興廢本末與此不同宜以唐史為正 又案南史齊武帝欲修白下城難於動役劉係宗啟謫役在東隨寓為逆者上從之後武帝講武白下履行其城曰係宗為國家得此一城 圖經云在城西北十四里今靖安鎮北有白下城故基父老傳云

卽此地也屬金陵鄉去府城十八里

開化城在縣南九十里環地三里六十步高五尺

東宮城案宮苑記宋元嘉十五年修永安宮為東宮城
四周土牆塹兩重在臺城東門外南東西開三門

金陵府城案宮苑記隋大業六年置玄風觀南園是
臨沂懷德同夏諸城並見廢縣

湖熟城湖熟古縣名漢屬丹陽郡宋元嘉中徙越城流
人於此城元和郡國志云在舊江寧縣東南七十里今

在上元縣丹陽鄉去縣五十里淮水北古城猶在詳見
廢縣

白馬城在江寧縣北三十里吳時烽火之所

舊志

考證金陵故事云吳時沿江烽火臺二所一在石城
左一在白馬城今不詳其所

竹里城在句容縣北一十里東陽鎮東二十五里

舊志

考證齊永元二年崔慧景叛向建康遣驍騎將軍張
佛護直闔將軍徐元稱等六將據竹里為數城以拒

之

竹城在溧水縣東南七十里環地二里高五尺有廟未

詳

杜城在溧水縣南一十二里環地四百餘步隋大業末

杜伏威屯軍於此

皇姥城在溧水縣南一百一十里大山南高五尺有廟

未詳

永世城在溧陽縣南十五里周三百步遺址高一二尺

漢元封中置永平縣尋廢吳分溧陽復置其後改曰永安晉武帝太康元年更名永世屬丹陽郡元帝又分永世為平陵皆屬義興郡宋元嘉九年省永世入溧陽今俗稱故縣內有唐隆寺舊基鄉民猶能言古狴犴之所晉伏滔陸曄皆嘗除永世令

趙城在溧陽縣東五里周二百步

梁城在溧陽縣西五十里周一百步

黨城在溧陽縣東十五里周一百五十步

新亭壘宋孝武入討元亮柳元景至新亭依山築壘東
西據險察賊衰竭乃開壘鼓譟以奔之賊衆大潰亭今
在城西南十二里壘不存

舊志

考證元徽二年桂陽王休範舉兵潯陽蕭道成屯兵
新亭以當其鋒築新亭城壘未畢賊前軍已至道成
登西垣使陳顯達等與賊水戰大破之江淹有新亭
壘詩

侯景故壘今桐林灣處卽古大航城在其南

舊志

考證梁紹泰元年北齊兵至建康陳霸先問計於韋
載載曰齊人若分兵據三吳之路畧地東境則斯事
去矣今可於淮南因侯景故壘築城以通轉輸乃遣
載於大航築侯景故壘使杜稜守之

賀若弼壘在上元縣北二十里

舊志

考證隋平陳賀若弼過江於蔣山龍尾築壘

韓擒虎壘在上元縣西四里今在石頭城西

舊志

考證元和郡國志隋平陳樹碑其文薛道衡之詞武

德七年趙郡王孝恭平輔公柝紀功碑與此相對本
李百藥之詞

仁威壘在句容縣

舊志

考證南史洪遜梁承聖初為國子祭酒二年為仁威
將軍城句容以居之命曰仁威壘 又故老相傳達
奚將軍屯兵於此或云棄甲因名甲城邑舊有祠在
武烈廟側土人感夢移廟甲城內東南

樂園壘晉義熙中盧循反劉裕築此壘以拒之在北郊

之西宋元嘉二十一年七月甘露降樂遊苑輿地志云上元縣東北八里晉時為藥園盧循反築藥園壘即此處也

今城郭

宮城在府城中已錄首卷

建康府城周二十五里四十四步上濶二丈五尺下濶三丈五尺高二丈五尺內卧羊城闊四丈一尺皆偽吳順義中所築也六朝舊城在北去秦淮五里故淮上皆

列浮航緩急則徹航為備吳沿淮立柵前史所謂柵塘是也至楊溥時徐溫改築稍遷近南夾淮帶江以盡地利城西隅據石頭岡阜之脊其南接長干山勢又有伏龜樓在城上東南隅自開寶克復昇州城郭皆因其舊紹興初略加修固乾道五年留守史正志因城壞復加修築增立女牆景定元年大使馬光祖以開濠之土培厚城身創硬樓四所一百七十八間又於柵寨門創壘城及硬樓七間閃門六扇皆裹以鐵圈門一座址以石

武臺二座鐵水窓二扇遶城浚濠四千七百六十五丈
有竒以深丈五濶三十丈為率城之外濠之裏皆築羊
馬牆其長如濠之數

門闕

古都城門案建康實錄晉成帝咸和五年作新宮始繕
苑城修六門注云六門都城門也晉初但有陵陽門後
改為廣陽門內有古尚方世謂尚方門次正中曰宣陽
門本吳所開對苑城門世謂之日門晉為宣陽門門三道

上起重樓懸楣上刻木為龍虎相對皆繡栴藻井南對朱雀門相去五里餘次最東曰開陽門宋元嘉二十五年改開陽曰津陽東面最南曰清明門門三道對今湘宮巷門東出青溪橋巷尚書下舍在此門內正東曰建春門後改為建陽門門三道正西曰西明門門三道東對建春門即宮城大司馬門前橫街也正北面即宮城無別門又案宮苑記凡十有二門南面最西曰陵陽門後改為廣陽門正門曰宣陽門次東曰開陽門後改為

建陽門門三道直北對端門最東曰清明門直北對延
憲門當二宮中大路東面最南曰來陽門直青溪橋巷
即今湘宮寺門路最北曰建春門陳改為建陽門西對
西明門即臺城前橫街北面最東曰延憲門南直對清
明門當二宮中大路次西曰廣莫門門三道陳改名北
捷門北直對樂遊苑南門次西曰玄武門門三道齊改
名宣平門北直趨玄武湖大路最西曰大夏門南直對
廣陽門北對歸善寺門西面最北曰西門門直對建陽

門即大司馬門前橫街是最南曰閭闔門西直對東陽門考宮苑記陵陽宣陽開陽三門與實錄所嚮皆同惟清明門在南面最東而實錄乃在東面最南今以宮苑記北對延熹門証之即實錄誤矣又實錄云正東曰建春正西曰西明宮苑記乃在東西面之最北其最南又有東陽閭闔二門蓋實錄都城上六門而宮苑記之門乃十有二宋紀獨載元嘉二十五年新作閭闔廣莫二門其餘延熹玄武大夏東陽四門不見建立之始建康

實錄元嘉二十五年四月新作閭闔廣莫等門改先廣
莫曰承明然則此六門同時作史略之爾然東西二門
相對實錄宮苑記皆云大司馬門前橫街則知東西舊
止二門各正所嚮後又增立二門故以南北別之也又
案宋元亮劾作亂閉守六門於門內鑿塹立柵齊建元
中始立六門都牆梁侯景濟江韋黯屯六門皆止言六
門而元亮劾傳又云同逆先屯閭闔門外臧質徙廣莫
門入乃知六門為正門後又立六門皆便門也故史不

載閭闔廣莫等門作於元嘉二十五年元兇劾之亂乃三十年云晉咸康元年以王導都督諸軍事禦石季龍帝觀兵於廣陽門令諸將分戍又宋明帝時聞有人謂宣陽門為白門以為不祥甚諱之右丞江謐誤犯帝變色曰白汝家門又陳大建十一年幸大壯觀大閱武步騎十萬陣於真武湖上登真武門觀宴羣臣因幸樂遊苑再幸此門觀振旅而還

古建康宮門晉成帝咸和七年新宮成名曰建康宮開

五門南面二門東西北各一門又宋文帝元嘉二年於臺城東西開萬春千秋二門又陳宣帝大建二年改作雲龍神武二門案建康實錄注南面二門正中曰大司馬門世所謂章門拜章者伏於此門待報南對宣陽門相去二里夾道開御溝植槐柳世或名為闕門近東曰闔闔門後改為南掖門門三道世謂之天門南直蘭宮西大路出都城開陽門其北面平昌門門上有爵絡世謂之冠爵門南對南掖門宋永初中改宮城北平昌門

為廣莫門至元嘉二十五年改先廣莫門曰承明門又
云南面端門夾門兩大鼓在兩塾之南並三丈八尺圍
用開閉城門日中晡時及晚並擊以為節夜又擊之以
持更宮苑記南掖門宋改闔闔門陳改端門東西二門
考之實錄已不可知見者唯南面二門與北面一門而已
又案宮苑記晉成帝修新宮南面開四門最西曰西掖
門門三道上重樓正中曰大司馬門門三道起三重樓
直對宣陽門次東曰南掖門宋改闔闔門陳改端門南

直對津陽門北對應門最東曰東掖門門三道南直對
蘭宮路東面正中曰東華門門三道晉本名東掖門宋
改萬春門梁改東華門北面最東曰承明門門三重本
晉平昌門南直對東掖門最西曰大通門上重樓西面正
中曰西華門晉本名西掖門宋改千秋門梁改西華門
凡八門比建康實錄所載多五門梁天監十年初作宮
城門三重樓及開二道又案宮苑記建康宮城內有兩
重宮牆南面開二門西曰衙門隱不見南西掖門東曰

應門晉改名正車門南直對端門即晉南掖門也東面正中曰雲龍門北面正中曰鳳粧門近西曰鸞掖門西面正中曰神武門凡六門第三重宮牆東直對牆南面正門曰太陽晉本名端門宋改為南中華門東面正中曰萬春門直東對雲龍門西對千秋門西面正中曰千秋門西對神武門東對萬春門凡三門建康實錄皆不載以宮殿証之雲龍門是第一重宮牆東面門對第二重宮牆萬春門神武門是第二重宮牆西面門對第三

重宮牆千秋門東西相望案圖可考足以想見臺城門
闕之盛然晉成帝時已有雲龍門蘇峻作亂羊曼為前
將軍率文武守此門是也

古朱雀門案宮苑記吳立初名大航門南臨淮水北直
宣陽門去臺城可七里又案地圖去宣陽門六里名為御
道夾開御溝植柳南渡淮出國門去園門五里晉成帝
咸康二年更作朱雀門對朱雀浮航南渡淮水宋大明
五年立馳道自閭闔門至於朱雀門六年又新作大航

門至孝武太元三年又起朱雀門重樓皆繡栴藻井門
開三道上重曰朱雀觀觀下門上有兩銅雀懸楣上刻
木為龍虎對立左右宋大明五年改為右臯門梁大同
三年復改為朱雀門以金陵圖考之當在今鎮淮橋北
左南廂

古東宮門案宮苑記南面正中曰承華門直南出路東
有太傅府次東左詹事府又次東左率府路西有少傅
府次西右詹事府又次西右率府東面正中曰安陽門

東直對東陽門西對溫德門西面正中曰則天門西直對臺城東華門東率更寺西家令寺次西太僕寺更西有典客省

古籬門案宮苑記舊京邑南北兩岸籬門五十六所蓋京邑之郊門也江左初立並用籬為之故曰籬門又云東籬門本名肇建籬門在古肇建市東西籬門在石頭城東南籬門在國門之西北籬門在覆舟山東玄武湖東南角有亭名籬門又有三橋籬門在光宅寺側白楊

離門古井離門在護軍府西離門外路北齊東昏時陳顯達舉兵官軍敗之於西州斬於離門側又崔慧景與江夏王寶元舉兵東昏遣將軍左興盛率臺內三萬人拒慧景於北離門始安王遙光據東府反復使左興盛屯東離門梁高祖建議命陳伯之進據離門天監八年新作緣淮塘南岸起後渚離門達於三橋

古宣陽門洛京舊名都城正中門也南直朱雀門相去五里門三道上起重樓懸楣上刻木為龍虎相對皆繡

柘藻井南史宋明帝時有人謂宣陽門為白門以為不祥甚諱之通典孝武時侍中何偃南郊陪乘鸞輅過白門偃偃將匐帝反手接之曰朕反陪卿也今宮城門疑是其處

古大司馬門在宣陽門內三國典略侯景攻臺城燒大司馬門後閣舍人高善寶以私金十兩賞其戰士直閣將軍宗思領將士數人踰城出外灌水久之火滅景又遣持長柯斧入門下斧門將開羊侃鑿扇為孔以槊刺

倒二人斫者乃退

古建春門臺城正東面門後改為建陽門謝希逸宋考武宣貴妃誅曰經建春而右轉循閭闔而逕度

古東掖門晉成帝修宮城南面開四門最東曰東掖門門三道南直蘭臺宮最西曰西掖門其地在今宮城東北

古南掖門宮城南面近東門案實錄南面次東曰閭闔門後改為南掖門世謂之天門南直蘭臺宮西大路升

平五年南掖門馬足陷地得銅鐘一有二四字注南掖門是建康宮南面東門陳朝改為端門南出都城開陽門即宣陽東門也南掖門疑即東掖門楊公則自越石移屯領軍府壘北樓與南掖門相對

古雲龍門第三重宮牆東面門對第二重宮牆萬春門宋劉湛初入朝委任甚重善論政道並前代故事聽者忘疲每旦入雲龍門御者便解駕左右羽儀分散不夕不出梁詔以肫為侍中司徒尚書令謝肫辭足疾不

堪拜謁乃角巾自輿詣雲龍門謝

古神虎門一曰神武門第二重宮牆西面門對第三重宮牆千秋門宋書傅亮永初四年為中書令直中書省專典詔命以亮任總國權聽於省見客神虎門外每旦車常數百兩齊陶弘景為高帝諸王侍讀奉朝請既而脫朝服掛神武門上表辭祿詔許之

古西明門臺城正西面門也實錄云宋徐羨之住西州高祖嘗思羨之便步出西掖門羽儀絡繹追之已出西

明門矣

古平昌門宮城北面近東門南對南掖門其地在今城東宋劉延孫為尚書左僕射疾病不任拜起上使乘舟自青溪至平昌門入尚書下舍

古廣莫門洛京舊名都城北面次西門也北直樂游苑

南門其地在今城東北

宋元嘉二十五年夏四月新作閭闔廣莫二門南史王曇首傳

元嘉四年車駕出北堂使三吏竟開廣莫門南臺云應須白獸幡銀字棨不肯開尚書左丞羊元保奏免御史中丞傅隆以下王曇首曰既無異敕又闕幡棨惟稱上旨不異單刺元嘉元年雖有再開門例此乃

前事之違今之守舊未為非禮其不請白獸幡銀字
祭致開門不時由尚書相承之失未合糾正上特無
問更立
科條

古國門梁天監七年作國門於越城南在今高座寺東
南澗橋北越城東偏

古望國門南史梁侯景犯建康令羊侃率千騎頓望國
門其地在越城東南

古光德門古跡編云在東門外趨蔣山路東北曲折處
舊傳如此未詳創建之因

石闕南朝宮苑記曰晉元帝於宮前立闕衆議未定王導指牛頭山為天闕不別立闕宋孝武大明七年於博望梁山立雙闕梁置石闕在端門外陸倕為銘序曰象其來已遠或以聽窮省冤或以布治縣法或表正王居或光崇帝里晉氏浸弱宋歷遼遲乃假雙闕於牛頭託遠圖於博望有欺耳目無補憲章治此石闕在端門外夾道而置之其上隱起奇獸異禽之狀白下門見白下亭

秦淮柵即柵塘也案實錄注吳時夾淮立柵又梁天監中作兩重柵皆施竹馬至南唐時置柵如舊

青溪柵在城東蘇峻之亂因風縱火進燒此柵官軍再敗卞壹父子死之隋平陳斬張麗華孔貴妃於此柵下今府城八門由尊賢坊東出曰東門由鎮淮橋南出曰南門由武衛橋西出曰西門由清化市而北曰北門由武定橋沂秦淮而東曰上水門由飲虹橋沿秦淮而西出折柳亭前曰下水門由斗門橋西出曰龍光門由崇道橋西出曰柵寨門

柵寨乾道元年正月十四日敷文閣侍制知建康府張孝祥言秦淮

之水流入府城別為兩派正河自鎮淮新橋直注大江其一為青溪自天津橋出柵寨門亦入於江緣柵

寨門地近為有力者所得遂築斷青溪水口狃為花園以為遊人宴賞之地因循至今每水源暴至則泛濫漫蕩城內居民尤所被害若訪古而求使青溪直通大江則建康永無水患矣詔汪澈指定以聞其後澈言欲於四圍依曩時河道開浚使水通柵門入江從之時孝祥已罷澈帥建康柵寨門歲久弗葺累定元年馬公光祖創硬樓七間每間濶六丈入深一丈三尺通濶四十二丈其下前壁閃門子六扇兩屋山武臺各一座屋下車軸車頰一座絞棒一十二條車窻麻索四條圈門一座高一丈五尺橫濶一丈四尺入深三丈四尺前後城面包砌四丈二尺其下石脚石面並鐵水窻二扇前後填石欄草椿木兩邊雁翅各高六尺五寸長三丈南北兩慢道各長五丈五尺前近濠岸木柵一路護險牆一路長四丈五尺兜幫前後舊城身長一十五丈

制使姚公希得任內重修諸城門稅亭備屋廊宇等自
景定三年二月十一日興工至九月十六日畢逐處修
整費錢二萬三千一百餘緡米五十七石六斗有奇

景定建康志卷二十